


# TEZAU LITURGIC

**16 IUNIE**

# SLUJBA SF. CUVIOS MOISE PUTILOV DE LA OPTINA



**MINEIUL PE IUNIE  
MOSCOVA**



# Месяца июня в 16-й день

## Преподобнаго

## Моисея Оптинскаго

### На велицей вечерни

Блажен муж: 1-й антифон. На Господи, воззвах:  
стихиры на 8, глас 8:

Что ты наречем, Моисее отче преподобне?/  
Обители благопоспешна строителя,/ жительства  
скитскаго основателя,/ благодатнаго старчества  
покровителя,/ духовнаго делания искусна  
подвижника,/ отческаго учения мудра наставника,/  
закон любви Христовы потщавшагося исполнити!/ Ты  
бо еси светило великое/ на небеси духовнем Оптины  
благословенныя.

Кто возможет воспети достойно/ Моисея,  
устроителя премудраго,/ пустынь Оптину  
возвеличившаго/ и основание старчеству в ней  
положившаго?/ Наставника кроткаго и пастыря  
добраго,/ брата попечительнаго и отца

любвеобильнаго,/ иночествующих собрание добре  
упасшаго!/ Того молитвами всех благ Податель/ да  
дарует нам мир и велию милость.

Измлада Христа всем сердцем возлюбивый/ и  
монашескому житию прилежавый,/ призванный  
смотрением Божиим/ из лесов Рославльских в  
пустынь Оптину,/ затворниче смиренный,/ жребием  
Божиим во игумена обители поставленный,/  
украшение и похвало Церкви Русския,/ дивный  
старче Моисее,/ не остави ныне чад своих.

От юности благочестию родителями научаемь,/  
чтению душеполезному прилежал еси,/ богомудре  
отче Моисее,/ и, любовь Христову познав,/ иноческий  
путь избрал еси,/ таже и братию искусно наставлял  
еси/ на путь спасения непрелестный,/ износя из  
сокровища сердца своего/ премудрость сокровенную.

Яко елень желает на источники водныя,/ сие  
душа твоя, отче Моисее,/ уединения молитвеннаго  
взыска,/ обаче, произволению Божию повинуюся,/  
воли своя отвергся еси/ и настоятельский жезл  
обители Введенския со смирением приял еси/ и, не

озираяся вспять,/ управлен был еси в Царствие  
Небесное.

Слава, глас 3:

Како по достоянию восхвалим тя, преподобне,/ подвиги своими страсти умертвившаго/ и деланием добродетелей душу свою украсившаго!/ Кто не удивится твоему великому терпению,/ снисхождению к ближнему,/ кротости и незлобию,/ нищелюбию и купли духовней!/ Ныне же в невечернем дни Царствия Божия/ с праведными наслаждаяся, отче Моисее,/ моли о почитающих память твою.

И ныне, Богородичен, глас тойже: Како не  
дивимся:

Вход. Прокимен дне. И чтения три преподобническая.  
На литии стихира храма.

И преподобному стихиры, глас 5:

Любовию Христовою уязвився/ и Тому послужити пламенне вожделев,/ мира удалися еси, отче Моисее,/ образ быв добродетелей евангельских./ Ныне же, во Свете неприступнем со всеми старцы Оптинскими/ предстоя Престолу Владычню,/ со

дерзновением молися земли Русской богоугодней быти/ и сыновом ея спастися.

Се, что добро или что красно,/ но еже жити братии вкупе!/ Сего ради, преподобне отче Моисее,/ смотрением Божиим во обитель Оптину поставлен бысть,/ пасти словесныя овцы Христова стада/ и наставляти их трезвению духовному,/ да будут вси едины,/ единими усты и едином сердцем/ славословяще Всесвятую Троицу.

Слава, глас 3:

Аще и взыска Моисей, угодник Твой, Господи,/ послужити Тебе в сокровении пустыннем,/ поставил еси его/ во главу славныя обители Оптинския,/ аще же восхоте сокрыти своя добродетели,/ известна светильника его воздвигл еси./ Темже со умилением вопием Ти, Человеколюбче:/ непрестанными молитвами преподобнаго/ щедроты Твоя подаждь нам и душам нашим велию милость.

И ныне, Богородичен, глас тойже:

Яко Нива неоранная,/ возрастила еси нам Хлеб Жизни,/ от Негоже вси питаемся, вернии,/ сего ради

достойно хвалим Тя, / яко Пресвятую Деву  
Богородицу, / жизни нашея Питательницу.

На стиховне стихиры, глас 6:

От юности познав благодать Божию, отче  
преподобне Моисее, / вся прелести мира сего во уметы  
вменил еси / и, плоть свою духови покорив, /  
подвигом монашеским вдався еси, / темже и, Богови  
усердне послужив, / дар безценный любви  
совершенныя от Него приял еси.

Стих: Честна пред Господем / смерть преподобных  
Его.

Безмолвие пустынное возлюбив, / преподобне отче  
Моисее, / посреде молвы житейских попечений /  
безмятежие ума сохранил еси, / в трудах же  
непрестанных пребывая, / денно и ношно имя  
Сладчайшаго Иисуса призывал еси, / темже и  
заповеди Его животворныя соблюл еси.

Стих: Священницы Твои облекутся в правду, / и  
преподобнии Твои возрадуются.

Смирение Христово всем сердцем возлюбив, /  
пред братиею своею себе умалил еси / и, начальник

рачительный быв,/ не пренебрег еси труды  
неможных и убогих,/ вся к пользе обители устроая,/  
темже Господь прослави тя, отче Моисее,/ Егоже моли  
о душах наших.

Слава, глас тойже:

Монахов множество собрав,/ добродетельным  
нравом тех оградил еси,/ преподобне отче Моисее,/ и  
деннонощными молитвами мысленных волков от  
стада твоего отгнал еси,/ темже и явился еси ко  
Христу ходатай непостыден./ И ныне убо молися Ему  
прилежно,/ обители твоей даровати утверждение/ и  
душам нашим велию милость.

И ныне, Богородичен: Творец и Избавитель:

Тропарь, глас 3:

Вертограда духовнаго благопоспешный  
насадитель/ и скитскаго жительство устроитель,/  
древних монашеских уставов ревнитель/ и в делании  
умнем премудрый наставник,/ яко восходящее  
светило/ славы Оптинския явился еси,/ преподобне  
отче Моисее,/ моли спастися душам нашим.

## На утрени

По 1-м стихословии седален, глас 3:

Сосуд божественный воздержания, богатство некрадомо благочестия показался еси, Моисее богоблаженне, ты бо, безстрастием уяснив житие твое, требующья милостынею обогатил еси. Темже, отче преподобне, моли Христа Бога даровати нам велию милость.

Слава, и ныне, Богородичен:

Не здравии требуют врача, но болящии, - сице рекл еси, Господи. Сего ради прибегаю к Тебе, Врачу душ и телес: исцели душу мою, немощствующую многими грехми, и предстательством Пречистыя Твоея Матери и всех преподобных отцев Оптинских молитвами даруй ми велию милость.

По 2-м стихословии седален, глас 8:

Многосветлая звезда иноком и образ разумнаго воздержания, милости богатая сокровищница и пресветлое зеркало разсуждения показался еси, преподобне отче Моисее. Ныне на Небеси, предстоя

Богови, испроси даровати прощение прегрешений  
светло совершающим память твою.

Слава, и ныне, Богородичен:

За нечестие сердца моего страстьми лютыми  
одержимь сый, от нечистых устен моих мольбу  
приношу Тебе, Пренепорочная, ущедри мя Твоими  
молитвами, Прибежище грешных и Божие Жилище.

Полиелей, и величание преподобному.

По полиелеи седален, глас 8:

Труды и подвиги твоя кто исповесть, блаженне  
Моисее? Верен бо раб своему Господину быв и  
усердно Тому послужив, умножил еси талант, тебе  
Господем вверенный, и с делатели благими жизнь  
вечную, яко мзду приял еси. Темже, яко имея  
дерзновение, моли Христа Бога, даровати согрешений  
оставление чтущим любовию память твою.

Слава, и ныне, Богородичен:

Оружие, Дево, по глаголу пророка сердце Твое  
прошедше, Крест Господень явися, иже, Сына Твоего  
страстию страсти убив, во оружие мира претворися,  
христианом победа непобедимая.

Степенна, 1-й антифон 4-го гласа. Прокимен, глас 4: Честна пред Господем/ смерть преподобных Его. Стих: Что воздам Господеви о всех, яже воздаде ми? Всякое дыхание: Евангелие от Матфея, зачало 43.

По 50-м псалме стихира, глас 6:

Богатая дарования от Бога приемь,/ Моисее преподобне,/ добре в подвизах преуспел еси/ и, зарями Пресвятаго Духа озарився,/ вертоград духовный и старчества плод благочестивый,/ яко дар Владыце Христу принесл еси,/ Иже, той паче всесожжения приемь,/ душу твою украси красотою/ и прослави тя славою нетленною.

Канон Богородицы

с ирмосом на 6, и преподобному на 8

Канон святаго, глас 1.

Песнь 1

Ирмос: Поим песнь новую Богу,/ от работы фараоновы/ избавльшему сыны израилевы,/ и в пустыни тыя препитавшему,/ яко славно прославися.

От юности чтению душеполезному прилежал еси, отче Моисее, сердечный сосуд наполняя мудростию отеческою, и, яко мудр книжник, Царствию Небесному научивыйся, уподобился еси человеку, износящу от сокровища сердца своего благое и чистое.

В ризу добродетелей облечен, труды и милостыни истканную, добропобедный воин Христов явился еси, преподобне отче Моисее. Ныне, радуясь, престолу Царя Славы предстоиши, Егоже моли о воспевающих тя.

Приклонися к молитвам притекающих к тебе, преподобне отче Моисее, и вознеси умы и сердца наша ко Господу, бремя страданий наших облегчи, да, спасаеми от бед, воспоем тебе песнь хвалебную.

Богородичен: Радуйся, Дево, Мати Христа, Сыном бо Твоим Божественным смерть умертвися, диавол поражен бысть и вси, верно восхваляющии Тя, обретают жизнь вечную.

### Песнь 3

Ирмос: *Не мудростию и богатством да хвалится смертный своим,/ но верою Господнею,/ православно зывая Христа Богу,/ и поя присно:/ на камени Твоих заповедей утверди мя, Владыко.*

Древним уставом иноческим поревновав, начало старчеству во обители Оптинстей положил еси, в нейже возсия собор преподобных отцев, наставивших множество верных на истинный путь спасения.

Подвизаяся взыти на высоту добродетелей, отче преподобне, на предлежащий тебе подвиг терпением востекл еси и трезвенным бдением страсти душегленные умертвил еси. Сего ради присно тя почитаем.

Непрестанною молитвою и трудами постническими чистоту сердца стяжал еси, преподобне отче Моисее, сего ради лицом к лицу зриши Пресвятую Троицу, Юже моли о спасении душ наших.

Богородичен: *Собрати расточенныя и воскресити умершыя Бог, преклонив небеса, сниде Тобою к нам,*

Богородице, и, соединив Божество с человечеством, радости всяческая исполни.

Седален, глас 4.

Подобен: Скоро предвари:

В болезнях благодушествуя, в пощениих долготерпя, и в молитвах подвизаяся, образ богомудраго пастыря стаду твоему показался еси, преподобне. Темже, яко теплаго предстателя ведуще, молим тя, Моисее отче наш: моли Христа Бога спастися душам нашим.

Слава, и ныне, Богородичен:

В день смерти моя, Непорочная Дево, избави мя от мрачных мытарств, осияй Твоим светом душу мою грешную, даруй Твоими молитвами грехов прощение и сподоби со Христом вселиться во обители Небесныя.

Песнь 4

Ирмос: *Велия тайна/ Твоего, Христе, смотрения:/ сию бо свыше провидя Богозрительно Аввакум,/ изшел еси, вопияше Тебе,/ во спасение людей Твоих, Человеколюбче.*

Смиренномудрою любовью брат твой по плоти Антоний, яко отца тя почиташе, обаче и ты ему вседушне повинулся еси, Моисее, образ стаду твоему преподав богоблаженного смирения.

Искусен быв зело и сугубую благодать стяжав, пустынь Оптину премудре устроил еси, темже и наша сердца, преподобне, сотвори во обители Духа Всесвятаго молитвами твоими.

Умом непрестанно Богу предстоя и в напастех непоколебимъ пребывая, якоже новый Моисей, выну зря Невидимаго, неврежденно море страстей прешел еси, путеводя монашеское сословие.

Богородичен: Ныне в чертозах Небесных со всеми святыми молиши Сына Твоего и Бога нашего, Пречистая, и предстательствуеши за нас, в обстояниих сущих, от немощей и страданий избавляющи, Богородице, Тебе поющих.

## Песнь 5

Ирмос: *Просветивый сиянием пришествия Твоего, Христе,/ и осветивый Крестом Твоим мира концы,/*

*сердца просвети светом Твоего Богоразумия/  
православно поющих Тя.*

Образ покаяния и Царства Божия провозвестник показался еси, отче Моисее, скитское житие твоим попечением устрояя, во еже братии благочестне спасатися, темже и нас посети святыми твоими молитвами.

На божественней стражи бодренно стояй, преподобне Моисее, братию трезвению духовному наставляя еси, да отсечением помыслов душевредных в чистоту сердечную облекутся.

От сердца милующаго подавал еси потребное бедствующим, сего ради обогати и нас, тя воспевающих, теплотою благодати Божественныя, радость духовную даруя.

Богородичен: Како на руку Твоею носиши вся рукою Держащаго и млеко питаеши вся дланию Питающаго? Како без семени раждаеши и по Рождестве Дева пребываеши? Сия суть бездна богатства и разума Божия.

## Песнь 6

*Ирмос: Обыде нас последняя бездна,/ несть  
избавляяй,/ вменихомся яко овцы заклениа./ Спаси  
люди Твоя, Боже наш,/ Ты бо крепость  
немоцствующи и исправление.*

Кто возможет достойно восхвалити сладчайший  
цвет пустынный, посреде терния попечений земных  
процветший и плод красный принесший, присно  
Духом благоухающий?

Обитель Оптинскую устроая, отче богомудре, и  
Архипастырю Небесному подобяся кротостию и  
сердечным незлобием, мысленныя волки от стада  
Христова отгнал еси и овцы Его на пажити отеческих  
писаний упасл еси.

Болезни наша душевныя и телесныя исцелити  
Господа умоли, отче Моисее, не остави нас, чтущих тя  
и милости просящих, посети ны молитвами твоими и  
к Царствию Небесному путеводи.

Богородичен: Слово Божие плоть бысть, во утробе  
Твоей, Пречистая, и, егда в Тя вселися, с человеки

поживе, от сего исполнения спасение вси вернии прияша.

Кондак, глас 3: Подобен: Дева днесь:

Непрестанная молитвы вознося, всю надежду на Христа возложил еси, темже исходатайствовал еси благодать ко просвещению души своея и вся потребная ко спасению братии Оптинския, ныне Богу в Раи сладости предстоя, Моисее преподобне: Того моли даровати нам велию милость

Икос:

Кто не удивится во плоти зря ангела, и не почудится кто, видя во множестве народа пустыннолюбца, незлобием побеждающаго озлобленных враги, и нищим благотворяща, ничтоже имуща? Се праведный и незлобивый отец наш, богомудрый Моисей, во Христа облекийся воистинну, и демоны прогнавый непрестанною молитвою, выну предстательствует о своей обители, и молит Господа добре утвердити ю, и даровати нам велию милость.

## Песнь 7

Ирмос: Авраамстии отроцы/ в пещи Троицу  
прообразивше,/ огненный пламень на росу  
преложиша,/ и поюще вопияху:/ благословен еси,  
Боже отец наших.

От юности книжную премудрость возлюбив,  
учение святых отцев добре познал еси и научил еси  
множество христолюбцев деланию духовному; темже  
прославляешися в Царствии Бога отцев наших.

Милостивым твоим сердцем, преподобне, всех  
вместил еси, по слову апостольскому, и примиритель  
враждующих быв, образ любви Христовы братии  
показал еси, во еже единодушно вопити: отцев Боже,  
благословен еси.

В неисчетных скорбех на Бога все упование свое  
возложил еси, присно в молитвах Господеви предстоя,  
Иже воздает за веру боящимся Его избавление от  
скорби, сего ради в радость общения со святыми  
вшел еси, во еже пети: отцев Боже, благословен еси.

Богородичен: Величаем Тя, милостивая Госпоже,  
присная Благодетельнице наша, возвеличившую род

наш, и святой покров Твой хвалим и благословим, яко Тобою научихомся пети: отцев Боже, благословен еси.

## Песнь 8

*Ирмос: Трисветлое существо, и трисолнечная слава/ сниде отроком посреде огня,/ сия невредимы соблюдающи,/ и Воскресение нам предвозвещающи/ Христа Бога нашего,/ Егоже поют ангели и множества, яко Победителя смерти во веки.*

Блажен еси, отче Моисее, яко претерпев многоразличная искушения, преуспел еси в художестве духовнем, еже искушаемым помощь подавати; сего ради приял еси венец жизни, обещанный всем любящим Господа, Победителя смерти во веки.

Пребывая во обителях небесных, взираеши на ищущих помощи от тебе, отче Моисее, скоро низпосли крепкую помощь нам, воздевая руце твои в молитвах за бедствующих чад твоих.

Благослови обитель твою, отче Моисее, идеже имя твое почитается, да устроятся стены ея духовныя,

укрепляеми твоими мольбами, и вси обитающии zde благочестно да будут храмы Духа Святаго, в добродетели и совершенстве.

Богородичен: Имея Тя крепкую поборницу и дивное заступление, Пречистая Мати Божия, во свете разума утверждаемся и от бед избавляемся, и от всея злобы диавольския и от всех наветов вражиих, прославляюще Рождшагося от Тебе.

### Песнь 9

Ирмос: *Тя, Юже виде Моисей неопалимую купину,/ и лествицу одушевленную,/ Юже Иаков виде,/ и дверь небесную, Еюже пройде Христос Бог наш,/ песньми, Мати Чистая, величаем.*

Словеса твоя быша всем соль спасительная, украси бо вся разумения твоя дар божественнаго разсуждения; темже обличения во время потребно употреблял еси, и к немощным снизходил еси. Сице и нас руководи ко спасению тя величающих.

Кто ныне, преподобне, разлучит тя от любве Божия? Ты бо, в жизни временней вседушно прилепився Господу, на одре болезни предсмертныя

утешения духовнаго от Него сподобился еси. Темже светом богоразумия просвети нас, тя величающих.

Имея душу милостивну и о нищих и убогих попечение, отче Моисее, добродетельми обогатил еси ближняя твоя, сотвори ныне сие на нас, вопиющих в нищете душевной, ничтоже бо доброе имаemy, во еже явити пред Богом, но мольбами твоими нашу нищету благоукраси, да тя величаем.

Богородичен: Увы, како низвержесе образ Твоего создания, Господи, прежде светлосияя царским достоинством Твоего подобия, ныне же сокрушен и омрачен! Но всеспасительным промыслием, чрез Деву отроковицу соделанным, возстави мя падшаго, и спаси мя святыми молитвами Твоея Матере Пречистыя.

Светилен:

В пустыннем безмолвии укрепився духовно, Моисей богомудрый поставляется, яко светильник горяй и светяй, на свещник игуменства во обитель Введенскую, к пользе изрядней zde окормляющихся.

Слава, и ныне, Богородичен:

Свет рождшая, Всепетая, око сердца моего  
ослепшее просвети, да прославлю Тя, иже Тебе ради  
спасаемь.

На хвалитех стихиры, глас 8.

Подобен: О преславнаго чудесе:

О преславнаго чудесе! / Посреде терний  
жителейских / крин дивный процвете, / Моисей  
преподобный, / благоухая молитвою умною, / яже  
далече прогоняет демоны, / удивляя красотю  
добродетелей, / и предстательствуя выну о всех, /  
любовию чтущих память его.

О преславнаго чудесе! / Кротости Божественныя  
избранный сосуде, / молитвы присногорящая  
лампадо, / разсуждения светильниче, / милости  
преизливаемый поточе, / любви Христовы  
обиталище, / Того моли, блаженне Моисее, / даровати  
прегрешений прощение / любовию чтущим память  
твою.

О преславнаго чудесе! / Двоица боголюбивых  
отцев, / Моисей и Антоний, голуби кротцыи, /

устроивше пустынный скит,/ на высоту созерцания  
от деяний востекше,/ крилами молитв покрывают  
ныне чад своих,/ и ходатайствуют у престола  
Всевышняго,/ еже в день судный улучити милость/  
любовию чтущим память их.

Послушания рачителю и трудолюбия правило,/  
молитвы светильниче негасимый,/ нищих изрядный  
попечителю,/ сосуде Божественныя милости,/  
оптинскаго старчества благий кореню,/ Моисее  
преподобне отче наш!/ Плоды целомудрия вкусити  
сподоби,/ совершающих священную память твою.

Слава, глас 6:

Благочестивых собрание,/ в веселии духовнем лик  
составите/ и песнями Божественными прославите/  
подвигона начальника оптинских отцев,/ Моисея  
богомудраго!/ Той бо жезлом молитвенным разделив  
море страстей/ и потопив мысленнаго фараона  
полки,/ в землю безстрастия введе избранныя люди/  
и, поприще совершив,/ бессмертным венцем  
увенчася./ Ныне же, престолу Вседержителя  
предстоя,/ молится со дерзновением о душах наших.

И ныне, Богородичен, глас тойже:

Удивися Иаков иногда,/ видя в видении Тебе,  
Дево,/ яко лествицу Небесную, Еюже сниде Бог,/ и от  
сна восстав, возопи в себе:/ Сия есть дом Божий и  
Врата Небесная.

Славословие великое и отпуст.

### **На Литургии**

служба преподобническая.

**[Священный Синод на заседании 16-17 июля  
2020 года (журнал № 34) утвердил к  
общецерковному богослужебному употреблению  
текст службы преподобному Моисею  
Оптинскому]**

